

Na osnovu člana 17. Zakona o provođenju kontrole zakonitosti korištenja prava iz oblasti branilačko-invalidske zaštite („Službene novine Federacije BiH“, broj:82/09) i člana 67. Zakona o organizaciji organa uprave u Federaciji BiH („Službene novine Federacije BiH“, broj:35/05), a uz saglasnost Vlade Federacije Bosne i Hercegovine, federalni ministar za pitanja boraca i invalida odbrambeno-oslobodilačkog rata, d o n o s i

PRAVILNIK O NAČINU I POSTUPKU VRŠENJA REVIZIJE

Član 1.

Ovim Pravilnikom se uređuje način i postupak vršenja provjere i sravnjavanja dokaza iz vojnih evidencija na osnovu kojih su utvrđene/potvrđene činjenice, na podlozi kojih su priznata prava iz oblasti branilačko-invalidske zaštite i povoljnijeg penzionisanja po propisima iz člana 1. Zakona o provođenju kontrole zakonitosti korištenja prava iz oblasti branilačko-invalidske zaštite (u daljem tekstu:Zakon).

Član 2.

Provjera validnosti dokaza iz člana 1. podrazumijeva provjeru autentičnosti i istinitosti sadržaja isprava, uvjerenja i druge dokumentacije kojima su od strane nadležnih organa uprave potvrđene činjenice iz službenih evidencija i provjeru službenih evidencija i dokumentacije na osnovu kojih su izdate isprave, uvjerenja i druga dokumentacija i provjeru autentičnosti i istinitosti sadržaja medicinske dokumentacije, te nalaza, ocjena, mišljenja ljekarskih komisija izdatih u postupku priznavanja prava.

Član 3.

U postupku provjere validnosti dokaza iz člana 1.ovog Pravilnika će biti provjerene slijedeće činjenice:

- status pripadnika Oružanih snaga;
- trajanje službe u Oružanim snagama;
- lični i formacijski čin vojne osobe;
- vršenje formacijske dužnosti u Oružanim snagama;
- okolnosti stradanja;
- valjanost medicinske dokumentacije;
- stepen oštećenja organizma;
- ratno odlikovanje;
- vršenja vojne dužnosti;
- premještaj, osnov prestanka vojne službe;
- visina otpremnine zbog prestanka službe i radnog odnosa;
- status prekobrojnog;

-valjanosti sporazuma između Federalnog ministarstva odbrane i demobilisanog borca.
-uzročno-posljedična veza između vršenja vojne dužnosti i rane, povrede, smrti, pogibije, nestanka, i dr.

Revizorski tim za kontrolu odlučuje koje će činjenice u svakom konkretnom slučaju kontrolirati zavisno od pravnog osnova ostvarivanja prava.

Pravni osnov ostvarivanja prava Revizorski tim za kontrolu konstatuje uvidom u rješenje i spis predmeta o ostvarivanju prava ili na osnovu izvještaja organa institucije koji je vršio priznavanje prava.

Član 4.

Provjera validnosti dokaza iz člana 1. vrši se sravnjavanjem podataka iz vojnih evidencija neposrednim uvidom u vojno-evidencione dokumente nadležne Grupe za pitanja evidencija iz oblasti vojne obaveze i Samostalnog izvršioca za pitanja evidencija iz oblasti vojne obaveze (u daljem tekstu:Grupe i Samostalni izvršiooci) Federalnog ministarstva za pitanja boraca i invalida odbrambeno-oslobodilačkog rata/Federalnog ministarstva za pitanja branitelja i invalida domovinskog rata (u daljem tekstu:Federalno ministarstvo), vojno-evidencione dokumente arhivskih depoa (arhivskog depoa Armije BiH, HVO-a i MUP-a) i dokumentaciju prijašnjeg Federalnog ministarstva odbrane čija je dokumentacija korištena u postupku priznavanja prava iz člana 1. Zakona i ostale relevantne dokumentacije drugih institucija.

Član 5.

Smatra se da činjenice nisu sporne ako su podaci u vojno-evidencionim dokumentima nadležne Grupe i Samostalnih izvršioca Federalnog ministarstva, arhivima Armije BiH, HVO-a i MUP-a , prijašnjeg Federalnog ministarstva odbrane i službi civilne zaštite međusobno identični.

Pripadnost Oružanim snagama BiH, vojni čin (osobni i formacijski), ratno odlikovanje i priznanje, okolnosti stradanja, vršenje vojne dužnosti na formacijskom mjestu komadanta bataljona ili formaciji višeg ranga, prekobrojnost, osnov prestanka službe (vojne i civilne), iznos otpremnine zbog prestanka službe smatra se nespornom činjenicom isključivo u slučaju ako postoji materijalni dokaz koji izvorno ili posredno dokazuje relevantne činjenice i ako su podaci o navedenim činjenicama u dokumentaciji ustanova i institucija iz prethodnog stava međusobno identični.

Član 6.

Nakon neposrednog uvida u evidencije i dokumentaciju ili uvida u izvještaje , te nakon sravnjavanja podataka i donošenja ocjene Revizorski tim za kontrolu /Revizorski tim za

koordinaciju sačinjava zapisnik o sravnjavanju podataka, konstatuje stvarno činjenično stanje i daje nalog Grupi i Samostalnom izvršiocu Federalnog ministarstva (član 6. st. 4,7. i 8. Zakona) zavisno od utvrđenog činjeničnog stanja.

Zapisnik potpisuju članovi Revizorskih timova za kontrolu i Revizorski tim za koordinaciju kao i predstavnik pravnog subjekta kod kojeg je izvršena kontrola.

Formirani spis predmeta sa zapisnicima o svim završenim kontrolama i svom dokumentacijom koja prati zapisnike (kopirani dokumenti, originali ili prepisi) Revizorski timovi za kontrolu i Revizorski tim za koordinaciju nakon završene revizije i ocjene predmeta će predati Federalnom ministarstvu radi daljeg postupanja.

Član 7.

U slučaju da se utvrdi da činjenice navedene u izdatim uvjerenjima na osnovu kojih je ostvareno pravo iz oblasti branilačko-invalidske zaštite i oblasti povoljnijeg penzionisanja nisu sporne (izdate u skladu sa vojnim evidencijama) Revizorski tim za kontrolu će sačiniti detaljan zapisnik i naložiti Grupi i Samostalnom izvršiocu Federalnog ministarstva da izda novo uvjerenje na obrazcu FMB-1.

Uvjerenja na obrazcu FMB-1, u predmetima lične invalidnine dostavljaju se Federalnom ministarstvu-Sektor za upravno rješavanje, a u predmetima porodične invalidnine obrazac FMB-1, Grupe i samostalni izvršiocu dostavljaju općinskoj službi branilačko-invalidske zaštite radi odlaganja u spis predmeta.

U predmetima povoljnijeg penzionisanja obrazac FMB-1 se dostavlja Federalnom zavodu za penzijsko i invalidsko osiguranje/ mirovinsko i invalidsko osiguranje (u daljem tekstu: Federalni zavod PIO/MIO).

Član 8.

U slučaju da Revizorski tim za kontrolu utvrdi i ocjeni da su činjenice navedene u uvjerenjima od kojih je zavisilo priznavanje prava sporne tj.nisu izdate u skladu sa službenim evidencijama, u svakom pojedinačnom slučaju provest će postupak dodatnog provjeravanja stvarnog činjeničnog stanja u roku od 30 dana od dana kontrole.

Član 9.

Na osnovu zapisnika Revizorskog tima za kontrolu, nakon dodatnih provjera kojim je utvrđeno da su upisane činjenice sporne, Grupe i Samostalni izvršiocu Federalnog ministarstva obavezni su sporne podatke u svojim evidencijama crvenom olovkom prekrižiti uz upisivanje broja i datuma zapisnika i izdati novo uvjerenje na obrazcu FMB-2.

Obrazac FMB-2 Grupe i Samostalni izvršioi Federalnog ministarstva dostavljaju u predmetima lične invalidnine Federalnom ministarstvu-Sektoru za upravno rješavanje, u predmetima porodične invalidnine općinskoj službi za branilačko-invalidsku zaštitu, a u predmetima povoljnijeg penzionisanja Federalnom zavodu PIO/MIO.

Član 10.

Revizorski tim za kontrolu će nakon svih provjeravanja obavljenih u drugim ustanovama i institucijama i nakon donošenja odluke sačiniti zapisnik i dostaviti ga subjektu kontrole, a jednu kopiju zapisnika Revizorskom timu za koordinaciju, uz svoj izvještaj o radu.

Član 11.

Provjera medicinske dokumentacije vrši se provjerom:

- autentičnosti nalaza i mišljenja nadležnih vojnih i civilnih medicinskih ustanova i službi na podlozi kojih je utvrđeno svojstvo vojnog invalida;
- uzročno-posljedične veze između oštećenja organizma i vršenja vojne dužnosti u okolnostima iz člana 3. Zakona o pravima branilaca i članova njihovih porodica („Službene novine Federacije BiH“, br:33/04, 56/05 i 70/07);
- nalaza i mišljenja nadležnih medicinskih ustanova i službi na podlozi kojih je utvrđen stepen oštećenja organizma, ortopedski dodatak i njega i pomoć druge osobe;
- pravilnosti u primjeni podzakonskih akata kojima je uređen postupak utvrđivanja stepen oštećenja organizma, ortopedski dodatak, njega i pomoć druge osobe iz člana 4. Zakona.

Član 12.

Provjeru autentičnosti nalaza i mišljenja, te medicinske dokumentacije vojnih medicinskih ustanova i službi na osnovu kojih je ocjenjen stepen invalidnosti, priznato pravo na ortopedski dodatak, priznato pravo na tuđu njegu i pomoć i priznato pravo na povoljnije penzionisanje vrše Revizorski timovi za kontrolu u saradnji sa Sektorom za upravno rješavanje Federalnog ministarstva na osnovu spisa predmeta.

Utvrđivanje uzročno-posljedične veze između oštećenja organizma i vršenja vojne dužnosti vrši se uvidom u autentičnu medicinsku dokumentaciju i podatke pod kojim okolnostima je vršena vojna dužnost.

Član 13.

Institut je dužan u slučaju postojanja uzročno-posljedične veze između vršenja vojne dužnosti i oštećenja organizma, postupajući u granicama zahtjeva Federalnog ministarstva, dati konačnu ocjenu, nalaz i mišljenje o stepenu oštećenja organizma, pravo na ortopedski dodatak, pravo na njegu i pomoć od drugog lica i postojanje

uzročno-posljedične veze za umrle ratne vojne invalide i nalaz dostaviti Federalnom ministarstvu.

Član 14.

Ukoliko se u postupku revizije potvrde sve činjenice na podlozi kojih je utvrđeno pravo iz oblasti branilačko-invalidske zaštite ili pravo na povoljnije penzionisanje, nadležni pravni subjekti koji su odlučivali o pravima, a na osnovu uvjerenja na obrazcu FMB-1 (ili zapisnika Revizorskih timova za kontrolu) stavit će oznaku izvršene revizije i o tome pismeno obavjestiti korisnika prava.

Član 15.

Ukoliko se u postupku revizije utvrdi da su činjenice na osnovu kojih je utvrđeno pravo iz oblasti branilačko-invalidske zaštite i pravo na povoljnije penzionisanje sporne (nisu dokazane ili je utvrđeno novo činjenično stanje), Federalno ministarstvo i Federalni PIO/MIO, svako u okviru svojih nadležnosti dužni su provesti postupak i odlučiti o pravima na podlozi činjenica utvrđenih u reviziji (uvjerenje FMB-2 ili na temelju zapisnika Revizorskog tima za kontrolu/Revizorskog tima za koordinaciju u slučaju kontrole prava na povoljnije penzionisanje).

Član 16.

Postupci pokrenuti radi ostvarivanja prava po odredbama propisa iz člana 1. ovog Pravilnika koji nisu okončani do dana stupanja na snagu Zakona o provođenju kontrole zakonitosti korištenja prava iz oblasti branilačko-invalidske zaštite, bit će predmet provjere po odredbama ovog Pravilnika po njihovom okončanju.

Član 17.

Revizorski tim za koordinaciju i Revizorski timovi za kontrolu mogu vršiti zvanične prepiske, preko Sektora za normativno pravne i opće poslove Federalnog ministarstva, sa svim subjektima čije je poslovanje bitno za poslove revizije radi prikupljanja potrebnih izvještaja ili neposrednog uvida u relevantnu dokumentaciju ili pribavljanja stručnih mišljenja, te radi rasvjetljavanja spornih činjenica.

Član 18.

Federalno ministarstvo-Sektor za normativno pravne i opće poslove i Sektor za pitanja vojnih evidencija će obezbjediti potrebnu dokumentaciju ili izvještaje o stanju vojnih evidencija nadležnih institucija Revizorskim timovima za kontrolu.

Revizorski timovi za kontrolu će se najaviti nadležnim institucijama radi ostvarivanja neposrednog uvida u evidencije i dokumentaciju.

Član 19.

Federalno ministarstvo će u predmetima porodične invalidnine, nakon provjere uvjerenja o pripadnosti i okolnostima stradanja, provjeriti ostalu dokumentaciju, te ili staviti oznaku izvršene revizije na posljednjem rješenju ili će o predmetu odlučiti svojim rješenjem prema utvrđenom činjeničnom stanju.

Član 20.

Predmete lične invalidnine, nakon provjere uvjerenja o pripadnostima i okolnostima stradanja i nakon provjere dokumentacije, Federalno ministarstvo-Sektor za upravno rješavanje, će uputiti Institutu-kantonalnim odjeljenjima instituta.

Ako je, nakon obavljenog medicinskog vještačenja, došlo do promjene utvrđenog stanja, Federalno ministarstvo će riješiti o pravu prema nalazu Instituta.

Član 21.

U predmetima dobitnika najviših ratnih priznanja i odlikovanja, nakon provjere uvjerenja o pripadnosti i uvjerenja o priznanjima i odlikovanjima Federalno ministarstvo-Sektor za upravno rješavanje će, nakon provjere ostale dokumentacije, staviti oznaku izvršene revizije ili predmet riješiti drugačije ako tako uslovljava novo činjenično stanje.

Član 22.

U predmetima povoljnijeg penzionisanja Federalni zavod PIO/MIO će obrazce FMB-1 uložiti u spis predmeta, te na osnovu zapisnika Revizorskog tima za kontrolu o ostaloj dokumentaciji ili staviti oznaku izvršene revizije ili odlučiti o pravu svojim rješenjem prema utvrđenom činjeničnom stanju Revizorskog tima za kontrolu.

Član 23.

U predmetima lične invalidnine, u postupku medicinskog vještačenja stepena oštećenja organizma, Komisija Instituta će, kada ocjeni potrebnim, uputiti korisnika prava da pribavi dodatne specijalističke nalaze u određenoj medicinskoj instituciji prema Instrukciji Ministarstva vodeći računa o prebivalištu korisnika.

Član 24.

Federalno ministarstvo-Sektor za upravno rješavanje će izvršiti reviziju korisnika prava ostvarenih do 06.04.1992.godine nakon što im općinske službe branilačko-invalidske zaštite, na njihov zahtjev, dostave spise predmeta.

Nakon izvršene revizije Federalno ministarstvo će, na rješenja ovih korisnika prava, staviti oznaku izvršene revizije (ako nema promjene) ili će o pravima ovih korisnika odlučiti svojim rješenjem prema utvrđenom činjeničnom stanju po provedenoj reviziji.

Član 25.

Kod korisnika prava koji su ostvarili pravo po osnovu pogoršanja stanja (član 11. Zakona o pravima branilaca i članova njihovih porodica) u postupku revizije ne može se utvrditi veći procenat vojnog invaliditeta.

Član 26.

Radu Komisija Instituta mogu prisustvovati ovlašteni predstavnici udruženja branilačke populacije.

Ovlaštenje za pristup radu ljekarskih komisija izdat će Federalno ministarstvo na prijedlog udruga.

Član 27.

Na poslovima revizije rješenja o pravima iz oblasti branilačko-invalidske zaštite, nakon provjere uvjerenja, pored uposlenika Federalnog ministarstva, angažovat će se uposlenici državnih organa uprave koji imaju iskustvo u postupcima priznavanja prava u oblasti branilačko-invalidske zaštite.

O ovom obliku angažovanja sačinit će se poseban sporazum između Vlade Federacije BiH i institucija iz kojih budu angažovani državni uposlenici.

Novčana naknada za rad državnih službenika iz drugih institucija će biti uređena posebnim propisom Vlade Federacije BiH.

Član 28.

Po odredbama ovog Pravilnika dužni su postupati Revizorski timovi za kontrolu, Revizorski tim za koordinaciju, te nadležni organi državne službe i drugi pravni subjekti koji su učestvovali u postupku priznavanja prava iz oblasti branilačko-invalidske zaštite i

oblasti povoljnijeg penzionisanja (PIO/MIO , Institut) i čija je dokumentacija bila osnov priznavanja prava iz člana 1. Zakona.

Član 29.

Vlada Federacije BiH će dostavljati izvještaje o provedenoj reviziji Predsjednici Federacije BiH i Parlamentu Federacije BiH.

Član 30.

Ovaj Pravilnik stupa na snagu narednog dana od dana objavljivanja u „Službenim novinama Federacije BiH“.

Broj: 05-41-325/10
Sarajevo, 20.01.2010.godine

MINISTAR

Zahid Crnkić

Na ovaj pravilnik Vlada Federacije Bosne i Hercegovine dala je saglasnost aktom V. broj 129/2010 od 08.03.2010.godine.